



A.nr.731/2026

Këshilli i Pavarur Mbikëqyrës për Shërbimin Civil të Kosovës-Kolegji për Shqyrtimin dhe Vendosjen e Ankesave i përbërë nga: Arben Mehmeti, kryetar, Ardita Haxhnikaj Demi dhe Malsore Gashi Bajraktari, anëtarë, me Avdyl Bekteshi, në cilësinë e procesmbajtësit, në procedurën sipas ankesës me numër A.nr.731/2026, të datës 02.07.2026, të parashtruar nga ankuesja L. R, të cilën sipas autorizimit e përfaqëson Avokate K.S, nga Lipjani, kundër organit të punësimit/Komuna e Lipjanit, në çështjen juridike “*kompensim material*”, duke vepruar në pajtim me nenin 6, paragrafin 1 nën paragrafin 1.1 dhe nenin 18 paragrafin 1 nën paragrafin 1.8 të Ligjit Nr. 06/L-048 për Këshillin e Pavarur Mbikëqyrës për Shërbimin Civil të Kosovës dhe Rregulloren Nr. 02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbimin Civil të Kosovës, më datë 21.07.2026, mori këtë:

V E N D I M

I.Këshilli i Pavarur Mbikëqyrës për Shërbimin Civil të Kosovës, *shpallet jo kompetent* për të vendosur lidhur me ankesën A.nr.731/2026, e datës 02.07.2026, të parashtruar nga ankuesja L.R.

II.Pala ankuese udhëzohet mbi të drejtën e inicimit të kontestit juridik-civil pranë gjykatës kompetente.

A r s y e t i m

Ankuesja L.R (tutje referuar vetëm ankuesja), më datë 29.06.2026, përmes postës, ka parashtruar ankesë në Këshillin e Pavarur Mbikëqyrës për Shërbimin Civil të Kosovës, e cila është pranuar më datë 02.07.2026, dhe është regjistruar nën shenjë A.nr.731/2026, kundër përgjigjes së datës 21.05.2026 të Udhëheqësit të Personelit të Komunës së Lipjanit, për mos pagesën e pagës së trembëdhjetë.

Këshilli i Pavarur Mbikëqyrës për Shërbimin Civil të Kosovës bazuar në dispozitat e Rregullores Nr.02/2018 për Procedurën e Shqyrtimit dhe Vendosjes së Ankesave në Këshillin e Pavarur Mbikëqyrës për Shërbim Civil të Kosovës, më datë 06.07.2026, ka proceduar kërkesën për përgjigje në ankesë tek Komuna e Lipjanit, ndërsa, kjo e fundit më datë 08.07.2026 ka përcjell vetëm provat ndërlidhur më çështjen duke mos dhënë përgjigje në pretendimet ankimore.

Kolegji për Shqyrtimin dhe Vendosjen e Ankesave pas shqyrtimit të shkresave të lëndës, konstaton se Këshilli i Pavarur Mbikëqyrës për Shërbimin Civil i Kosovë **nuk është kompetent** për të vendosur për ankesën e parashtruar nga ankuesja, *sepse*:

Nga administrimi i shkresave të lëndës rezulton se ankuesja sipas Akt Emërimit me Nr. 01-101/03-37767 të datës 02.08.2024, ka qenë e punësuar në pozitën Zyrtare për Biblioteka, në Sektorin për Arkiva në Komunën e Lipjani, sipas kategorisë Bibliotekiste, klasës së pagës E23.

Ankuesja më datë 10.04.2026 i është drejtuar Udhëheqësit të Personelit në Komunën e Lipjanit me kërkesë për kompensimin e pagës së trembëdhjetë, ndërsa Udhëheqësja e Burimeve Njerëzore në Komunën e Lipjanit më datës 21.05.2026, përmes përgjigjes në kërkesë ka njoftuar ankuesen se kërkesa nuk mund të realizohet për shkak që jeni pensionuar më datë 10.01.2026 dhe nuk keni qenë në listën e pagave si zyrtar aktiv në kohën e ekzekutimit të pagës së 13 dhe sipas vendimit të Qeverisë së Republikës së Kosovës nuk është paraparë kompensim retroaktiv për ata që nuk janë në sistemin e pagave.

Ankuesja në ankesën e parashtruar në Këshillin e Pavarur Mbikëqyrës për Shërbimin Civil të Kosovës, pretendon se nuk është bërë trajtim i barabartë për shkak që është diskriminuar nga pagesa e pagës së trembëdhjetë, andaj kërkon që të miratohet ankesa, të obligohet Komuna e Lipjanit që të bëjë kompensimin e pagës së 13.

Rrjedhimisht, në kuptim të kompetencës materiale të Këshillit të Pavarur Mbikëqyrës për Shërbimin Civil të Kosovës, për vendosje lidhur me këtë çështje juridike-administrative, Kolegji fillimisht thekson faktin se ankuesja sipas Akt Emërimit me Nr. 01-101/03-37767 të datës 02.08.2024, ka qenë e punësuar në pozitën Zyrtare për Biblioteka, në Sektorin për Arkiva në Komunën e Lipjanit, sipas kategorisë Bibliotekiste, klasës së pagës E23, pra nëse i referohemi shtojcës Nr. 8 të Ligjit Nr. 08/L-196 për Pagat në Sektorin Publikë, klasa të cilën i referohet kësaj pozitë hyn tek pozitat e shërbimit publikë. Kështu që duke ju referua dispozitave të nenit 5 të Ligjit Nr.08/L-197 për Zyrtarët Publik, më të cilin përcaktohet se: *“Kategoritë e zyrtares/it publik janë: 1.1. Nëpunësja/i i shërbimit civil; 1.2. Nëpunësja/i i shërbimit publik; 1.3. Krijuesja/i dhe përformuesja/i e/i artit dhe kulturës; 1.4. Nëpunësja/i teknik dhe mbështetës; dhe 1.5. Zyrtarja/i i kabinetit. 2. Nëpunësja/i i shërbimit civil është zyrtarja/i publik në kuadër të shërbimit civil i cili merr pjesë në formulimin dhe/apo zbatimin e politikave, monitorimin e zbatimit të rregullave dhe procedurave administrative dhe ofrimin e mbështetjes së përgjithshme profesionale dhe administrative në zbatim. Nëpunësja/i i shërbimit civil ushtron detyrën në pozitën përkatëse, duke filluar nga zyrtarja/i profesional deri në pozitën e drejtueses/it të lartë, në administratën e Presidentes/it të Republikës së Kosovës, në administratën e Kuvendit të Republikës së Kosovës, në Zyrën e Kryeministres/it të Republikës së Kosovës, në Ministri, në Agjenci Ekzekutive dhe në degë lokale të tyre, institucione të pavarura kushtetuese, në agjenci të pavarura dhe rregullatore, në administratën komunale dhe çdo nëpunës/ës statusi i të cilit është përcaktuar si nëpunës/ës i shërbimit civil, me ligj të veçantë. 3. **Nëpunësja/i i shërbimit publik** është zyrtarja/i publik i cili ofron shërbime publike të drejtpërdrejta për qytetarët në fushën e arsimit, shëndetësisë, **kulturës, artit**, në fushën e mjekësisë ligjore, si dhe shërbime tjera të ngjashme publike. Nëpunësja/i i shërbimit publik ushtron detyrën në pozitën përkatëse duke filluar nga niveli profesional deri në nivelin e lartë drejtues. Nëpunësja/i i shërbimit publik është edhe nëpunësja/i i shërbimeve të brendshme në administratën e shërbimeve publike pjesë e administratës shtetërore, në administratën e shërbimeve publike apo pjesë e komunës...”*, rrjedhimisht në kuptim të këtyre dispozitave ligjore rezulton pozita e ankueses e kategorizuar si Bibliotekiste kishte status të nëpunësit të shërbimit publik, që përjashtohet nga fushëveprimi i kompetencës së Këshillit të Pavarur Mbikëqyrës për Shërbimin Civil të Kosovës, sepse, duke u bazuar në nenin 6, paragrafi 1, nën paragrafin 1.1 të Ligjit Nr.06/L-048 për Këshillin e Pavarur Mbikëqyrës për Shërbimin Civil të Kosovës, Këshilli i Pavarur Mbikëqyrës për

Shërbimin Civil të Kosovës, është kompetent për të shqyrtuar vetëm ankesat e nëpunësve civilë dhe kandidatëve për pranim në Shërbimin Civil. Mirëpo edhe përkundër këtij fakti, rezulton se ankuesja sipas Vendimit me Nr. 01-118/02-67763 të datës 11.12.2025 i ka përfunduar marrëdhënies e punës për shkak të arritjes së moshës së pensionimit më datës 10.01.2026, pra nga kjo datë ankuesja nuk ka ndonjë lidhje kontraktuale me institucionin ku ka pasur të themeluar marrëdhënien e saj të punës.

Si rrjedhojë, referuar pretendimeve ankimore të parashtruara si në ankesë, rezulton se në rastin konkret kemi të bëjmë më raport juridiko-civil, pasi që kemi të bëjmë më kompensim material, kështu që, Kolegji lidhur më të drejtën e ankueses në mjete juridike si e drejtë kushtetuese garantuar më Kushtetutë dhe Konventën Evropiane për të Drejta e Njeriut (neni 13), udhëzon palën ankuese që drejtën e tij materiale të pretenduar si në ankesë ta realizoj në kontest civil në pajtim me dispozitat e Ligjit përkatës për Procedurën Kontestimore.

Thënë si me sipër e në mbështetje të nenit 18 paragrafin 1 nën paragrafin 1.8 të Ligjit Nr.06/L048 për Këshillin e Pavarur Mbiqyrës për Shërbim Civil të Kosovës, Kolegji i Këshillit vendosi si në dispozitiv të këtij vendimi.

Vendimi hyn në fuqi në ditën e nënshkrimit nga Kryetari i Kolegjit.

Këshillë juridike: Kundër vendimit të Këshillit, pala e pakënaqur mund të iniciojë konflikt administrativ në Gjykatën Administrative në Prishtinë- Departamenti për Konteste të Punës, brenda afatit prej tridhjetë (30) ditësh nga dita në të cilën i është dorëzuar vendimi. Inicimi i konfliktit administrativ nuk e ndalon ekzekutimin e këtij vendimi.

KËSHILLI I PAVARUR MBIKËQYRËS PËR SHËRBIMIN CIVIL TË KOSOVËS
Lënda;A.nr.731/2026, datë 21/07/2026

Avdyl BEKTESHI

Procesmbajtës

Arben MEHMETI

Kryetar i Kolegjit

Vendimi i dërgohet:

- Përfaqësueses së ankueses Avokate K.S;
- Udhëheqësit të Njesisë së Burimeve Njerëzore në Komunën e Lipjanit; dhe
- Arkivit të KPMSHCK- së.